

Mepepelime mo Ufaru ma Bulu a tyo ya Aza a Tasalonika

Ucuḏuwu wa aatagada a nda

Bulu ḏa ḏanai mepepelime ma nda waru u ḏana ta mepepelime mo ro a tyo aza e Itoni a Tasalonika. Tasalonika lyuci gbain ḏa a nge'en m mala ne eden aḓunḏa. Waru ubata u ḏa a na ama aḓunḏa a ri oo tono amaḓi. Bulu tawa ta atsuma a Tasalonika reve u rito ama adama e Yesu. Ayi pe u ḏavusa ta amuna o ogoro adama u tsura ikebe. Aza e itoni ya amaḓi na aḓunḏa o o'wo ta aza e Itoni ya Yesu. Aza a Isra'ila fo atsuma a lyuci'i o o'wo ta aza e Itoni.

A mantsa wa'a, reve azagbain a lyuci'i a uwa tsushu'un, aḓu o loso Bulu ubata'a. A tyo ḏe, reve Bulu lyungu kambi va yi Timoti u 'yawa u tawa yi ni ili i na yaa farasa na aza e Itoni a na u lyawai ḏe Tasalonika. Timoti tawa yi ta na adanshi a sa'ani, a mantsa ma na wu uwwai adanshi a sa'ani a nda a ḏa Bulu ḏanai mepepelime ma nda.

Aḓajini o uritosu atsuma e mepepelime ma nda ayi ḏa, cine ili yaa ḏana a mantsa ma na Yesu a kamba atsuma o uvadi u nda. Ili na aḓunḏa i ta fara a mantsa mo ndolo. Tsaa gura reve urana u na ili i ndolo yaa fara shi, adama o ndolo tsu 'yuwan tsu ciga atsu e ipiri tsu yuwan wuma cine Asula a cigai. Bulu cuḏuwa ta ili i nda suru atsuma e mepepelime ma nda.

Ili i na i ri pe atsuma a aatagada a nda

1. Icasu (1:1-3)
2. Ucawu wo okolo wa aza a Tasalonika ni iroci i le (1:4-3:13)
3. Wuma u na u tsu yo'onoto Asula okolo (4:1-12)
4. Ili i na a zuwusa yaa fara na Zagbain kamba (4:13-5:11)
5. Ili yu ukosu i na aa yuwan ni icasu (5:12-28)

¹ Amu Bulu, na Sila na Timoti, atsu da tsaa danasaa aza e Itoni atsuma a Tasalonika mepepe-lime ma nda. U ta a tyo ubata a ama a na a ri aza a Asula waru aza a na a ri aza a Zagbain Yesu Kristi Zamawawa a na a ri de ubata'a.

N ta yuwusan avasa Asula o roco du isa'ani ya yi waru u zuwaa du aba'un a asuvu nden!

Ama a Tasalonika a ta nu ucawu wo okolo

² Atsu tsu godyusho ta Asula adama a du. Waru a mantsa suru na tsaa yuwusan avasa, tsu yuwaan du ta avasa.

³ Na tsu yuwan adanshi na Asula na Dada tsu adama a du, tsu yuwan ta adanshi e ili i na yaa yuwusan adama o ucawu wo okolo a du. Waru tsu yuwan ta adanshi a du adama o ulinga wu ucira u na i yuwain adama a na i cigai ama. Waru tsu yuwan ta adanshi a du adama o ulyuwu we elime u na yaa kalyuwusa Zagbain Yesu Zamawawa nni i ri pe atsuma a atsumalima.

⁴ N'utsa n va, Asula a ta na adu o okolo, waru atsu tsu reve ta a na u dangwa ndu yo o'wo ama a yi.

⁵ Ana tsu damma ndu Alabari a Sa'ani, ni idan-shi i da goon shi, amma nu ucira, adama a na Ruhu va Akiza ca du ta urevu lon ana tsu damma ndu

amayun. Ana tsu danai obolo na adu, ye ene ta cine tsu yuwain nden n tsu o rocosu amayun e ikaka i tsu.

⁶ Ne da i ritoi i yuwan cine atsu tsu yuwain nden, waru cine Zagbain Yesu yuwain nden ma yi. Ko na atsuma a atsumalima a abunda i ushi ta ikaka'a, Ruhu va Akiza zuwa du ta i yuwan mazanga.

⁷ Ne da fo yo o'woi iroci e ekere a ama a na o toniyi Zagbain atsuma a Makidoniya na Akataya.

⁸ Waru adama a du a da ikaka yi Zagbain i bazai atsuma e ida i ndolo, hali u karalai ubata u ndolo suru. Ama ko te da a uwwa ta adama o ucawu wo okolo a du. Adama o ndolo tsa a ciga tsu dashi yuwan adanshi o ndolo shi.

⁹ Ama'a na aciyele a lyuwa ta elime a yuwusan adanshi cine i ushi ntsu. Waru a yuwan ta fo adanshi cine i vadalai i lyawai amali a du na cine yaa yuwusaan Asula a amayun aganda za na ri wuma.

¹⁰ Waru a ta dansa cine i ri ufo6u a pura makamba ma Mawun ma yi Yesu u tawa diga zuwa. Asula a 'yasan ta Yesu atsuma a akwakwa, waru Yesu dada aa wawusa tsu atsumalima o uge'etosu u na waa tawa.

2

Ulinga wa Bulu atsuma a Tasalonika

¹ Ama a va, i reve ta ana tsu bura ndu pere da shi.

² Cine i revei, tsu dana ta atsuma a Filibi kafu tsu tawa ya'a du. De da a ca ntsu atsumalima reve waru a yuwaan tsu ulamu. Agba Asula a ca tsu ta okolo o ugbamu u na tsu damma ndu Alabari a

Sa'ani a alanga e eteshe, ko na wo o'woi ama o ro e gigeshe tsu t̄a d̄e.

³ Tsu t̄awāā d̄u ni ikaka i tsu ōbolo ne epen shi. Waru tsu t̄awāā d̄u nā ayi no okolo o ro d̄e ko'o shi, ko adama a na tsu cigai tsu yuwaan d̄u ugbozu shi. Ne d̄a shi, ko ke'en!

⁴ Āsulā ā usu tsu t̄a, d̄ada u ca ntsu Alabari a Sa'ani ā yi ts̄arā tsu damma ama. Ili i na tsu cigai ayi d̄a tsu yo'onoto Āsulā o okolo adama a na ayi d̄a u tsu lyungw̄ā okolo ā tsu. Ātsu tsu zuwa atsuvu e ili i na ama a dansa shi.

⁵ Ād̄u i reve t̄a a na ica i na tsu cuwa nd̄u ica ye epen i d̄a shi, waru Āsulā na aciyayi u to roco ili i na tsu yuwain, tsu yuwan le adama tso ōbonu ili suru shi.

⁶ Waru tsu yuwan ili i ro ts̄arā tsu tsurā tsugbain e ekere ā d̄u shi, ko e ekere a ama a na a buwai.

⁷ O un̄ā u na, ātsu ajiya e Yesu Zamawawa d̄a, tsu shi ta zuwa d̄u i ca tsu ili. Agba tsu yuwan ne shi, amma, reve tso o'wo ben ātsumā ā d̄u cine mma tsu ca mawun maani reve waru u golōbo yi.

⁸ Tsu ciga d̄u t̄a lon, waru tsu t̄a nā māzangā ma na tsaa damma d̄u Alabari a Sa'ani ā Āsulā. Waru tsu t̄a nā māzangā ma na tsaa kamba d̄u ātsumā e ili icu'un icu'un, adama a na yo o'woi ama a na n cigai lon.

⁹ Ama ā vā, i cuwan cine tsu yuwain ulinga nu ucira u tsu suru ana tsu d̄anāi nā ād̄u. Usana na ayin tsu yuwusan t̄a ukadu wi izami yi ikebe adama e ili i na tsu cigai tsu tsula suru. Tsu zuwaa d̄u ume shi, ana tsu d̄anāi ōbolo nā ād̄u a yuwusan alajiya a Alabari a Sa'ani ā Āsulā.

¹⁰ A_đu ye ene t_ā ne esu a đ_u, waru A_sul_ā e reve t_ā ne, a na tsu ri cece na amayun, waru ko za aa gura tsur_ā ili i na woo goro a aci a tsu shi cine tsu yuwain n_ā a_đu, a_đu aza a na i usuyi Zagbain.

¹¹ Waru i reve t_ā cine tsu guz_āi za suru cine dada tsu kalyuw_ā muwun m_ā yi.

¹² Tsu te ipati i đ_u, waru tsu ta casu đ_u adanshi, waru tsu ta zuwusa đ_u, i yuwan nden n na m_āā t_āw_āā A_sul_ā n_ā tsugbain adama a na ayi đ_ā u de nd_u i uwa a_tsum_ā o tsugono ts_ā yi tsar_ā i tsur_ā tsugbain ts_ā yi.

¹³ A mantsa suru tsu to godyusho A_sul_ā adama a na i usuyi ikaka i na tsu yuwaan nd_u alajiya. I damma adanshi a tsu idanshi ya ama a đ_ā goon shi. I ushi yi t_ā cine u ri amayun. Ikaka y_ā A_sul_ā i đ_ā. Waru ikaka'a i lyuwa t_ā elime a yuwusan ulinga a_tsum_ā a đ_u aza a na a usuyi.

¹⁴ Ama a v_ā, ana i usuyi ili i na tsu dammai, ama a đ_u a ca đ_u t_ā a_tsum_āl_{im}ā. Ne đ_ā yo o'woi vadamma a'is_ā a_zā e Itoni a A_sul_ā a_tsum_ā a Yahuda. Ama o ndolo a usu t_ā Yesu Zamawawa, amma ama e le, aza a Isra'ila, a ca le t_ā fo a_tsum_āl_{im}ā.

¹⁵ Aza a Isra'ila o ndolo o una t_ā amasul_ā e le, hali ozo o ro e le o una Zagbain Yesu. Gogo a ca tsu t_ā a_tsum_āl_{im}ā a_vu o loso tsu o ut_ā. Ama a nda o yo'onoto A_sul_ā okolo shi, waru a 'yuwan t_ā ama suru.

¹⁶ A putsa tsu t_ā a na tsa_ā yuwan adanshi na Atakpaci, adama a tsur_ā iwawi wan. A ta yuwusan ne waru a t_ā đashishi nusu le. Gogo A_sul_ā a yuwan t_ā upan waru u ca le t_ā a_tsum_āl_{im}ā.

Bulu ciga t_ā bura le

¹⁷ Ama a va, ana o loso ntsu atsuma a du, tsu jima shi, reve tsu uwa maluwa ma na tsaa kamba ya'a du. Tsu lyawa majiyan ma du shi, ko ke'en, tsu dana ta na maluwa ma na tsee ene du.

¹⁸ Amayun a da a na tsu shi tsu cigai tse ene du, amu Bulu, n yuwan ta ukadu mantsa na abunda adama n tawa ya'a du, amma reve Male me geshe tsu.

¹⁹ Ili i na i zuwai n cigai me ene du ayi da i ta tawusa tsu nu uzuwu wo okolo, waru i tawaa tsu ta na mazanga, waru adu da iroci yu ulyuwu wa aci a tsu. I ta zuwa tsu tsu yuwan mazanga a makakan ma Zagbain tsu Yesu nnu u tawa.

²⁰ Amayun, adu da tsugbain tsu tsu na mazanga ma tsu.

3

¹ Adama a na tse enei tsaa gura danu babu na tsu uwwai alabari a du shi, dada tsu isawantoyi adanshi tsi isawan atsuma a Atina ne'en,

² reve tsu lyungu Timoti ya'a du. U ta yuwusan ulinga obolo na atsu ana aagbashi a Asula, reve waru u yuwan alajiya a Alabari a Sa'ani a Kristi Zamawawa. Tsu lyungu yi ta adama u zuwa du i gbama waru u dashi du okolo ugbamu o ucawu wo okolo a du.

³ Tsu ciga du yoo o'wo udamu adama a addama a na i ri pe shi. Na ne suru, i reve ta a na a dangwa ntsu de adama o oso a atsumalima a nda.

⁴ A mantsa ma na tsu danai obolo na adu tsu ronuso du ta atsuvu a na addama a ri lo a tawa du babu ujimu. Waru i reve a na addama'a a tawai de.

⁵ N reve ta na addama a du, waru maa gura danu babu na mu uwwai ili i na yaa bala du o okolo a va adama a du shi. Ayi da i zuwai n lyunguwa ndu na Timoti. N lyungu yi ta adama we ene ko ucawu wo okolo a du a buwa ta ugbamu. N ta uwwusa wovon she Za Malyungwa ma lyuwa aci a du o ure u ro avu waru ulinga u tsu woo o'wo pere wan.

Timoti dammai ili i na we enei

⁶ Gogo da Timoti rawai ana wu utai ya'a du. U tawa tsu ta na alabari a sa'ani adama o ucawu wo okolo ni icigi i du. U kambuwa tsu ta a na yaa cuwusan na atsu na mazanga, waru i ta maluwa ma na yee ene tsu cine atsu tsu ri a maluwa ma na tsee ene du.

⁷ Ama a va, atsu a aciyatsu tsu ta pa na addama a abunda, waru a ta casu tsu atsumalima lon, amma tsu tsura ta okolo o utanu adama a na i buwai pe nu ucira atsuma o ucawu wo okolo a du.

⁸ Tsu reve ta i ta mishin nu ucira atsuma a Zagbain Yesu, ayi da gba waa casu tsu mazanga ma asuvu ma na wuma u tsu u tsura ta ucira.

⁹ Tsu godyoo ta Asula lon adama a du! Adama a du tsu ta na mazanga ma abunda a makakan ma Asula a tsu.

¹⁰ Urana na ayin tsu ta yuwusaan du avasa babu uro. Waru tsu te ipati ya Asula u lyawa tsu tse enishe du adama ni i cigisa ili i ro atsuma o ucawu wo okolo a du, tsu ca du.

¹¹ Tsu ta avasa Asula Dada tsu na Zagbain tsu Yesu lyawa tsu tsu bura du.

¹² Tsu ta yuwusan ipati Zagbain zuwa icigi i du i kungwa, waru u shiwan hali u kara a rawusa

ubata aza a du hali a tyo e ekere a za suru, cine icigi i tsu i shiwain a tyo ya'a du.

¹³ Wi isawaton okolo a du aza a babu unusu atsuma a akiza a makakan ma Asula Dada tsu, a mantsa ma na Yesu Zagbain aa tawa na aza a akiza a yi.

4

Vu yuwan nden n sa'ani a makakan ma Asula

¹ O ukosu, ama a va, cine tsu damma ndu atsuma a ala a Zagbain tsu Yesu Zamawawa, tsu ta fo e ipati i du i yuwan nden n na woo yo'onoto Asula o okolo. Tsu rito du ta de i yuwan ne waru i ta yuwusan ne. Waru tsu ta patishi du i lyuwa elime na mayan ne,

² adama a na i ta cuwusan ni ili i na tsu rito ndu a ala a Zagbain Yesu.

³ Asula a ciga du ta i dana cece, adama o ndolo i suma cu'un vu unusu u tsipere suru.

⁴ Reve za suru u golo6o lipu va yi, avu u yuwan nden n na n ri na akiza na ama a ca yi tsugbain.

⁵ Ne da yaa yuwan nden atsuma e icigi i mayan ma tsipere vadamma aza a amali shi. E reve Asula na re va yi shi.

⁶ She vu paala za va wu vi Itoni atsuma e ili i nda, vu zami ka va yi wan, adama a na Asula a ta tawaa na atsumalima o una wi icu'un vu nusu ndolo suru. Tsu rono du ta atsuvu na abunda.

⁷ Asula a de tsu ta adama tso o'wo cece, agba u de tsu adama tsu yuwain nden mi idaba shi.

⁸ Za na kudai a yuwan nden oo tono wila u nda, wila u vuma u da u 'yuwain a yuwan tsutoni na ayi

shi, amma Asulā a da waa 'yuwusan, za na ca ndu Ruhu va Akiza va yi.

⁹ Asulā na aciyayi u rito du ta i cigalai, adama o ndolo ili yi lo shi na yaa zuwa mu n danaa du adama e icigi ya aza e Itoni a na wu ntsayi e ene atsuma a ama a Asulā.

¹⁰ Amayun a da, gogo i ta ni icigi ya abunda a tyo ubata aza e Itoni a na a ri e ida ya Makidoniya. Ama a va, ko na wo o'woi ne, tsu te ipati i du i dashi icigi a tyo ya'a le lon.

¹¹ Ili i na yaa la'a yuwan maluwa ayi da nda: I danu sanyi, i yuwan majiyan me ili i na yaa yuwusan goon, waru i linga ne ekere a du, cine tsu damma ndu nu ufaru.

¹² Ne da ama a na a ri aza e Itoni shi a ca du tsugbain adama a nden n du, waru ya dana a kalyuwusa nanza ca du ikebe shi.

Cine Zagbain aa kamba

¹³ Ama a va, n ciga du ta i reve ili i na yaa fara na aza e Itoni a na a kuwai, adama i dana tapu na atsumolangu tsa ama a na a ri nu uzuwu wo okolo shi wan.

¹⁴ Tsu usu ta a na Yesu kuwai, waru a 'yasan yi ta avu u kamba wuma. Waru tsu ca ta okolo na Asulā aa tawato Yesu waru, u ta kamba o'olo na ama suru a na a cayi okolo ya Yesu kafu a kuwa.

¹⁵ Cine Zagbain Yesu yuwain adanshi na aciyayi a na, atsu na tsu ri wuma a mantsa ma na Zagbain aa kamba tsa a wala elime a aza a na a ri pe ason e le shi.

¹⁶ Zagbain na aciyayi u ta cipa diga zuwa. A mantsa ma ndolo ma da ama a uwwa udammu wu ucira wu Zagbain, reve waru a uwwa abajini

a yisaali o unā wu zagbain vu nlingata mā Asulā, reve a uwwa e ivulusā aavana ā Asulā. Ne dā, aza a na ā kuwāi atsuma ā Kristi Zamawawa a fara 'yon ā tyo zuva.

¹⁷ Reve atsu na tsu buwai wuma āvu tsu buwa atsuma o uvadi reve ā falā tsu ā tyo atsuma e eleshe obolo ne ele, āvu suru ntsu tsu ga'asan nā Zagbain zuva reve tsu danā obolo nā ayi babu ukotu.

¹⁸ Adama o ndolo i vowontoloi okolo waru i gbamatoloi aciyadu ni idanshi i nda.

5

¹ Ama ā vā, ili i ro yi lo na yaa zuwa mu n danaa du cine ko mantsa ma na ili i ndolo yaa fara shi,

² adama a na i reve tā ulobonu lon urana wu Zagbain u tā tawā cine vivu tsu tawā na ayin.

³ A mantsa ma na ama aa dansa, “Ili suru i tā mejege, asuvu nden tā lo waru babu addama o ro,” a mantsa ma dāda ulungusu wāa riyā le babu urevu, cine mbala n limatan n ri usān lon nā mantsa ma rawa zuzu. A mantsa'a babu ure u mala'aa diga a addama o ndolo.

⁴ Ama ā vā, she i danā atsuma e irumbu adama e ili nda wan, waru she i yuwan asalama nnu urana wu Zagbain tawā gashi vivu wan.

⁵ Adama a na suru ndu muwun me ekan n dā waru muwun mu urana n dā. Tsu ri āzā e irumbu na ayin shi.

⁶ Adama o ndolo i yuwan ipiri i sa'ani, she i lantsa cine ozo o ro ā ri a nlavu wan. I danā e ipiri nu uguzu wa aci.

⁷ Ayin mantsa ma dā na ama a tsu lantsa waru mantsa ma dā na ama o tso o'wo usowu.

⁸ Agba atsu na tsu ri a nden atsuma e ekan tsu 'yuwan tsu ciga tsu gitsai aciyatsu. Cine soja tsu fobo aciyayi nna wu nla utugu wa aaraga a makakan ma yi, tsu 'yuwan tsu ciga tsu foboi aciyatsu adama na Mekerencesu ma tawa, tsu gura lyuwa elime nu ucawu wo okolo ya Yesu avu waru tsu lyuwai elime ni icigi ya ama. Cine soja tsu fobo aciyayi nna wo oto melezu mo uvon, tsu 'yuwan tsu ciga tsu dana nu uzuwu wo okolo a na Yesu a wawa tsu.

⁹ Tsu yuwain ili i nda adama a na Asula a zuwa ta okolo u wawa tsu o ucira wu Zagbain tsu Yesu Kristi. Ayi Asula u tsuwan tsu upan wa yi shi.

¹⁰ Zagbain Yesu kuwa ta adama a tsu, adama tsu yuwain wuma obolo na ayi babu ukotu. Ayi nda amayun a da na tsu ri wuma ko cina tsu kuwa a mantsa ma na u kambai.

¹¹ Adama e ili i ndolo suru, i gbamatoloi asuvu reve i suwulai aciyadu cine i ri a yuwusan.

Uritosu wu ukosu

¹² Ama a va, i ca aza a na a ri azagbain a du atsuma o ulinga wu Zagbain tsugbain. A linga ta lon atsuma a du waru a damma du ta adama e ili i na i ri ulobonu shi a na yaa yuwusan.

¹³ I ca ama a nda tsugbain waru i ciga le adama o ulinga u le. Waru i yuwan nden n sa'ani vani du.

¹⁴ Ama a va, ni i ciga i 'yuwan i rono orogo atsuvu. I dashi aza a na a tsu lapa uwwa wovon shi okolo ugbamu. I toni ben waru i kalyuwa aza a na a ri nu ucira shi. I yuwan ankuri na za suru.

¹⁵ She i lyawa nanza tsupa iwuya ni iwuya wan, amma i yuwan ukadu i yuwunlai isa'ani waru na za suru.

16 I ḁana na mazanga kuci.

17 I lyuwa elime na mayan ma avasa.

18 Ko ni ili i ro i fara, i ḁana na no okolo o ugodyusho, adama a na wo o'woi ili i na Asula a cigai a tyo ya'a ḁu ḁa a za a na a ri aza a Kristi Yesu Zamawawa.

19 She i geshe Ruhu va Akiza wan.

20 She i kuḁa a tara adanshi e ili yu usokowu ya Asula ili ya aḁula wan.

21 Amma i 'yuwan i ciga i lyungwa ili suru i na a dammai. I guza ili i na i ri ulobonu.

22 I suma cu'un vi iwuya suru.

23 Tsu reve ta a na Asula a ḁa aa casu asuvu nden, waru n ta yuwusaan ḁu avasa u zuwa ḁu yoo o'wo aza a akiza o ure suru. N ta yuwusan avasa u geshe okolo na asuvu na lipu ḁu diga a mayan mo unusu e re suru, hali she urana u na Zagbain tsu Yesu Zamawawa kamba.

24 Za na dangwa ndu za va aḁula ḁa, waru u ta yuwan ili i ndolo.

25 Ama a va, i yuwaan tsu avasa.

26 I casa aza e Itoni a na a ri ḁe suru ni ikatalu ya amayun.

27 N te ipati i ḁu atsuma a ala a Zagbain, i denuna o u'wa wu Zagbain suru mepepeline ma nda.

28 N te ipati Zagbain roco ḁu isa'ani ya yi suru.

**Nzuwulai n Sa'avu na Tsishingini na adiva a
na a dangulai a Nzuwulai mu Ufaru
New Testament in Tsishingini (NI:tsw:Tsishingini)**

copyright © 2011 Wycliffe Bible Translators, Inc.

Language: Tsishingini

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tsishingini

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files
dated 29 Jan 2022

bb185c63-dc44-572c-ae93-66252c4dfa1e